



Nkene to nyolitha evalo lyokanona



Okunyolitha evalo lyokamoye osha simana noonkondo. Okambo haka otake ku lombwele:

- ▶ nkene shi li sha simana opo u nyolitha evalo lyokanona
- ▶ nkene to nyolitha evalo lyokanona
- ▶ oompango dhomikalo dha yooloka dhokunyolitha onzapo yevalo
- ▶ oompango dhokunyolitha evalo lyokanona ka valwa pondje yondjokana
- ▶ shoka to ningi ngele owa kanitha onzapo yevalo lyokamoye.

Okambo haka oki ikolelela komainyolitho goonzapo dhomavalo, dhoondjokana nodhomaso. Oshitokolitho 81 sho-1963, nomaueyelele ga gwedhwa po ga gandjwa kUuministili wlikwagumbo nOmatembukilomo.

**Okanona kehe ka vaelwa muNamibia oke na okumona onzapo yevalo,
nonando aavali yako kaye shi Aanamibia.**

Omolwashike wu na okunyolitha evalo lyokamoye?

Una okanona ka nyolithwa, aavali ohaya pewa odokumende yopambelewa hayi ithanwa onzapo yevalo. Onzapo yevalo otayi gandja uukwatya wokamoye, esiku lyevalo, ehala lyevalo, nedhina lyomuvali gumwe nenge ayehe.

Opu na omatompelo ogendji ga simana opo wu nyolithe evalo lyokanona:

- ▶ Ekotampango lyaNamibia otali ti kutya uunona owu na uuthemba wokukala nedhina nuukwashigwana. Onzapo yevalo oyo aluhe ondondo yotango opo ku gamenwe uuthemba mbuka.
- ▶ Ompango otayi ti kutya kehe omuvali oku na oshinaku-gwanithwa shokunyolitha evalo lyokamwana, mbala ngaashi tashi vulika sho opo ka valwa.
- ▶ Ngele okamoye oka vaelewa muNamibia nenge kaavali Aanamibia, onzapo yevalo otayi kwathele mokuulika kutya okamoye okakwashigwana kaNamibia.
- ▶ Nowaa na onzapo yevalo lyokamoye, oto ka kala nuudhigu okunyolitha okamoye mosikola, okumona omayakulo gopaundjolowe nenge okumona gomakwathelo gepangelo. Okamoye oka pumbwa wo onzapo yevalo ongekwasihilipaleko lyomimvo dhako moongundu dhomaudhano posikola.
- ▶ Okamoye oka pumbwa onzapo yevalo opo ka ka thanekwe okamutse uuna ka gwanitha omimvo 16. Ngoye owa pumbwa onzapo yevalo nokamutse opo wu mone opasporta, wu hogolole, wu mone olisensa yokuhinga nenge wu hokane/hokanwe. Okamoye oka pumbwa onzapo yevalo opo ka ninge iinima ngaashi okupatulula oakaunta yombaanga nenge oku ka longa miilonga yontumba.
- ▶ Okunyolitha evalo otaku kwathele wo epangelo li tseye kutya uunona ungapi wu li miitopolwa ya yooloka muNamibia. Shika otashi kwathele epangelo li tokole kutya omayakulo geni nomakwathelo ga pumbiwa moshitopolwa kehe.



Owu na okukambadhala opo wu nyolithe evalo lyokamoye mbala ngaashi tashi vulika (muule womasiku 14 konima sho ka valwa osho dhangi). Shampa okanona ka koko ohapu kala uupyakadhi uunene opo wu gongele oodokumende ndhoka na pumbwa opo wu ka nyolithe evalo lyokanona.

Una onona owindji inawu nyolithwa nenge uunona mboka wa nyolithwa kwa toka owo uunona mboka wa za momidhingoloko ndhono dhi li moluhepo pankalathano nopaiyemo. Okunyolitha evalo lyokamoye oyo ondondo yotango ndjoka tayi fala komeho mokukandula po onkalo ndjika yoluhepo.

Okunyolitha evalo okoshali. Kapu na ondando ya sha nenge ofuto.

Omatompelo gahamano okamoye ka pumbwa okumona onzapo yevalo

1. Opo ka mone omakwatho gopaundjolowele ngaashi etuntilo
2. Opo ka mone omakwathelo gopashimaliwa kepangelo
3. Opo ka nyolithwe mosikola
4. Opo ka mone okakalata kokamutse (ID) nenge opasporta
5. Opo ka hokane/hokanwe
6. Opo ka hogolole

Itashi vulika wu ninge iinima mbika oyindji waa na onzapo yevalo, ihe otashi kala oshidhigu noonkondo molwashoka onzapo yevalo oyo omukalo omupu okuulika omimvo dholela.

Onzapo yevalo oshike?

Onzapo yevalo oyo odokumende yopambelewa ya gandjwa kUministili wlikwagumbo nOmatembukilomo ndjoka tayi gandja uuyelege wuukwatya wokanona, esiku lyevalo, ehala lyevalo, nedhina lyomuvali gumwe nenge aavali ayehe.

Okamutse oshike?

Okamutse (ka tseyika wo okakalata koka-ID) oko odokumende hayi gandjwa kUministili wlikwagumbo nOmatembukilomo taku ulike uukwatya womuntu. Oke na efano lyomuntu. Ohaku ulike edhina lyomuntu, ehala nesiku lyevalo nonomola yokamutse.


Okanona kehe muNamibia oke na okukala ke na onzapo yevalo nokamutse. Oto vulu okuninga eindilo lyokamutse sho wa gwanitha omimvo 16.

Nkene to nyolitha evalo lyokamoye

Osha simana opo wu nyolitha okamoye mbala ngaashi tashi vulika sho owala opo ka valwa. Momahala gamwe, oto vulu okunyolitha okamoye moshipangelo moka we ka monene. Ngele moshipangelo moka we ka monene ihamu gandjwa eyakulo ndino, owu na okunyolitha okanona koombelewa dhUministeli wlikwagumbo nOmatembukilomo dhopepepi dhomoshitopolwa.

Opu na omikalo mbali dha yooloka dhokunyolitha evalo, shi ikolelela kutya owa ningi eindilo pwa piti ethimbo li thike peni sho okanona ka valwa. Owa pumbwa okweetelela oodokumende dhontumba, ndhoka dha tulwa momusholondondo pepandja 5. Ngele owa gandja uuyelege auhe wa pumbiwa, oto pewa mbala onzapo yevalo yokamoye.

Otashi pula ndje ethimbo ele opo ndi ka pewe oodokumende ndhoka nda pumbwa opo ndi nyolithhe evalo lyokamwandje. Kandi shi ngele otandi shi ningi.



Ashike osho uuthemba wokanona! Okanona kehe okapumbwa okukala nonzapo yevalo mbala ngaashi tashi vulika konima yokuvulwa. Shika otashi kwathele okamoye opo ka mone omakwathelo monkalamwenyo ayihe. Osho oshinakugwanithwa shoye onga omuvali opo wu kale wa kwashilipaleka kutya evalo lyokamoye olya nyolithwa. Kashi shi omulandu omudhigu.

Omikalo dha yooloka dhokunyolitha evalo odhini?

Una wa nyolitha evalo lyokanona muule womvula yimwe sho okanona ka valwa, omulandu gweinyolitho nguka ohagu ithanwa “**Etseyitho lyevalo**”. Ohashi vulika wo wu nyolithhe okanona konima sho ka valwa nale, uuna okanona ke na omimvo dhi vule gumwe. Shika ohashi ithanwa “**Enyolitho lyevalo lya tokelwa**”. Oonzapo dhomavalo ohadhi kala dha faathana.

Oto vulu okukambadhala okunyolitha okamoye muule womumvo gumwe. Shika otashi ningwa molwashoka owa pumbwa omakwatho gopaundjolowele gokamoye muulethimbo ndika. Oshi li wo oshipu okunyolitha Etseyitho lyevalo shi vule okunyolitha Enyolitho lyevalo lya tokelwa.

Otandi nyolitha ngiini evalo lyokamwandje sho owala opo ka valwa (nenge muule womvula yimwe sho okanona ka valwa)?

Owu na okulandula omulandu **g**W**Etseyitho lyevalo**. Owa pumbwa okweetelela oodokumende ndhika:

- ▶ Okakalata koshipangelo kokamoye
- ▶ Okamutse nenge okopi yokamutse nonzapo yevalo yomuvali gumwe nenge dhaavali ayehe. Ngele ngoye omuzaizai wa kala muNamibia owu na okweetelela opasporta yoye nopelemeta ndjoka ye ku pa uuthemba opo wu kale muNamibia. Oshi li nawa opo aavali amuhe mu ye ne yene, ngele otashi vulika. Ngele omuvali gumwe okwa mana oondjenda, owu na wo okweetelela okopi yonzapo yeso ya dhengwa oshihako.
- ▶ Ngele aavali yokanona oya hokana: onzapo yehokano nenge okopi yonzapo yehokano ya dhengwa oshihako nenge omushangwahokololo gwa za kumwene gwomukunda ngele aavali oya hokana kohi yompango yopamuthigululwakalo.

Omunambelewa ote ku kwathele okuudhitha **ofoloma yetseyitho lyevalo**. Otashi kala wo shi na oshilonga wu etelele oombapila dhimwe ndhoka wa pewa koshipangelo sho wa mono okanona. Ngele owa kanitha oodokumende dhoje, tango owu na okuninga eindilo lyookopi dhokupingena po poombelewa dhopepepi dhomoshitopolwa dhUministili wlikwagumbo nOmatembukilomo nopo ihe to nyolitha evalo lyokamoye. Ngele natango ou na uupyakadhi nenge waa na oodokumende ndhoka wa pumbwa, owu na okupopya nomunambelewa gwomombelewa yUministili wlikwagumbo nOmatembukilomo e ku pe omayele.

**Otandi nyolitha ngiini
okamwandje ke na omimvo
dhi vule pugumwe?**

Owu na okulandula omulandu gwenyolitho lyevalo lya tokelwa. Owa pumbwa oodokumende dha faathana nodhetseyitho lyevalo. Ngele ku na okakalata koshipangelo kokamoye oto vulu okulongitha okakalata kegongalo kokamoye.

Ngele ku na oodokumende ndhi wa pumbwa, omukuluntusikola goposikola mpoka pwa hita tango okanona nenge mwene gwomukunda gweni otaya vulu okuninga egano pamushangwa opo ya gandje uuyelegelele kombinga yomimvo nuukwatya wokamoye. Ngele ku na po nando oyo odokumende yasha, aakalelipo yaali mboka ye vule okamoye nomimvo ntano oye na oku ya pamwe nangoye opo ya gandje uuyelegelele kombinga yomimvo nuukwatya wokamoye. Aavali yokanona ayehe yaali otaya vulu okukala aakalelipo ngele kapu na shili omuntu gwontumba ngoka ta vulu okugandja uuyelegelele wa pumbiwa.

Ngele owa nyolitha evalo lyokanona ho ka pitilila omimvo 14, Uministili otawu ku indile opo wu etelele okanona opo ke ye ka kuthwe omanyala onga omuthika gweyeleko lyegameno.



Ombaapila yegano nookopi dha dhengwa iihako odha yelithwa pepandja 9.

Olye ta vulu okuninga eindilo lyokunyolitha evalo?

Onkalo	Olye ta vulu okunyolitha evalo?	Ofani monzapo yevalo lyokanona oshike?
OOFANI: Ngaashi ekalata lya yelitha, okamoye otaka yi kofani yoye nenge kofani yomuvali omukweni. Shika otashi ti kutya ofani ndjoka yi li pokamutse koye nenge pokamutse komuvali omukweni odhi na okukala tadhi tsu kumwe nofani ndjoka ya pewa kokanona. Luna okamoye ka valwa e to pewa okakalata koshipangelo, owu na wo okukala wa shilipalelwa kutya ofani ndjoka yi li pokamutse koye nenge pokamutse komuvali omukweni otayi tsu kumwe nofani ndjoka yi li pokakalata kokanona koshipangelo.		
Aavali ayehe oya hala okunyolitha evalo lyokanona. Aavali oya hokanathana.	Kutya nee omuvali. Aavali ayehe otaya kala momusholondondo ponzapo yevalo lyokanona. Aavali oye na okweetelela onzapo yawo yehokano.	Ofani yaavali ya hokanathana. (Ngele aavali ohaya longitha ofani dha yooloka, oye na okuhogolola kutya ofani yini yomwaandhika tayi longithwa kokanona.)
Aavali ayehe oya hala okunyolitha evalo lyokanona. Aavali inaya hokanathana.	Kutya nee omuvali. Omusamane ota kala owala momusholondondo gwonzapo yevalo ngele aavali ayehe oya tsa kumwe mushika. Omusamane oku na okukala po, nenge a gandje egano pamushangahokololo ngoka tagu gandja epitikilo kutya okwa pitika a ye momusholondondo gwonzapo yevalo.	Otashi vulika yi kale ofani yomuvali kehe. Ofani yomusamane otayi longithwa owala ngele yo nomukulukahi oya tsu kumwe mwaashika. Ofani otashi vulika yi kale ofani yomukulukadhi.
Omukulukadhi nenge omusamane okwa hala okunyolitha evalo. Aavali inaya hokanathana. Omuvali gumwe oku na omwenyo ihe ina kutha ombinga mokunyolitha okanona.	Omukulukadhi nenge omusamane. Omukulukadhi ita tegelelwa a gandje uuyeleele washa kombinga yomusamane ngele aavali mbaka inaa hokanathana.	Ofani yomuvali ngoka a nyolitha evalo lyokanona.

Omukulukadhi nenge omusamane okwa hala okunyolitha evalo. Omuvali omukwawo okwa mana oondjenda.	Omuvali e na omwenyo. Omukulukadhi ita tegelelwa a gandje uyelele kombinga yomusamane ngele aavali mbaka inaya hokana. Owu na okufala onzapo yeso yaNakusa ngele owa hala ku longithwe ofani yaNakusa monzapo yevalo. Edhina lyaNakusa otali vulu owala okutulwa mo uuna onzapo yevalo opo tayi ningwa oshikando shotango. Oonakusa itaya vulu okutulwa mo monzapo yevalo komasiku gokomeho.	Ngele owa gandja onzapo yeso, ofani oyomuvali kehe otayi vulu okulongithwa. Ngele ku na onzapo yeso, ofani yomuvali ngoka a nyolitha okanona oyo tayi longithwa.
Aavali ayehe oya mana oondjenda. Okanona okathigwa. Omutekuli gwokanona ota vulu okunyolitha evalo.	Odokumende kehe ndjoka tayi ulike uukwatya wokanona naampoka ka valelwa. Shika otashi kwatele mo uumutse waavali, oonzapo dhomavalo noonzapo dhamaso, nenge ombapila ya za kumwene gwomukunda, omukuluntusikola nenge omuniilonga gwonkalonawa.	Ofani yomuvali, kehe otayi vulu okugandja uyelele wa gwana opo wu ulike omapambathano.
Aavali ayehe oya mana oondjenda. Okanona okathigwa. Uunona otawu vulu okunyolitha omavalo gawo ngele wa koko.	Aantu yaali oye na okuya pamwe nokanona. Aantu mbaka oye na okukala taya vulu okushilipaleka kutya okanona oka valelwa muNamibia. Aantu mbaka taya kwatele okanona oye na okukala ya valelwa muNamibia, ye na okamutse kaNamibia noye na okukala ye vule okanona hoka taka nyolithwa nomimvo ntano.	Ofani yomuvali, kehe otayi vulu okugandja uyelele wa gwana opo wu ulike omapambathano.

Otatu
ithana
okanona
haka John
van Wyk.
Van Wyk
ofani
yate.



Ashike ofani yoye
oJanuary. Otwa pumbwa
okunyola ofani yoye
nenge ofani yahe.
Ngele onda nyola ofani
ya yooloka pokakalata
mpaka, oto ka kala wu
na uupyakadhi moku ka
nyolitha evalo lyokanona.

OODOKUMENDE DHA KANA

Ongiini ngele onda kala ndaa na onzapo yevala nenge okamutse kandje mwene?

Ngele ku na onzapo yevala owu na okwiinyolitha ngoye mwene komulandu gwokwiinyolitha evalo lya tokelwa. Ngele ku na okamutse ihe owu na onzapo yevala, owu na okuninga eindilo lyokamutse poombelewa dhopepepi dhUministili wlikwagumbo nOmatembukilomo moshitopolwa. Nopo ihe to vulu okunyolitha evalo lyokamoye.

Onda kanitha ombapila ndjoka tayi ulike mpoka pwa vaelwa okanona. Otandi vulu natango okunyolitha okanona?

Eeno, oto vulu. Owu na okuya kokanyothi hoka wa monena okanona e to pula okopi ndjoka tayi ulike mpoka ka vaelwa. Ngele ito vulu okumona okopi, owa pumbwa okuulika uyelele wumwe mboka tawu vulu okugandja uyelele wuukwatya wokanona nehala mpoka ka vaelwa. Shika otashi vulu shi kale shimwe nenge yimwe yomwaambi tayi landula: okakalata kokanona kegongalo, omushangwahokololo gwegano gwa za komuleli gwopamuthigululwakalo, nenge omushangwahokololo gwegano gwa za komuntu gulwe ngaashi omukuluntusikola gwoposikola mpoka okanona ka li haka hiti tango nenge omuniilonga gwonkalonawa.

Omuleli gwopamuthigululwakalo okwa lombwele ndje ndi fute iimaliwa oyindji omolwomushangwahokololo gwegano. Oshike tandi vulu okuninga?

Oto vulu okumona omushangwahokololo gwegano okuza komuntu gulwe, ngaashi komukuluntusikola gwosikola mpoka okanona ka li haka hiti tango nenge omuniilonga gwonkalonawa nenge omusita ngoka a shasha okamoye.

Egano lyopamushangwahokololo otandi li ningi ngiini?

Owu na okuninga egano lyopamushangwahokololo pakwathelo lyaKomufala gwOmaganitho. Komufala gwOmaganitho oto mu adha plisitasi yopolisi, moombanga nomoombelewa dhoveta. Opo wu ninge egano lyopamushangwahokololo, owu na okunyola omushangwahokololo ngoye mwene, nenge wu lombwele Komufala opo a nyole shoka to popi. Komufala ote ku pula opo wu gane kutya shoka wa popi oshi li mondjila. Opo ihe to shaina omushangwahokololo nenge u sitambe omanga Komufala a tala ko. Komufala opo nee ta dhenge po oshihako podokumende opo a kwashilipaleke kutya osho egano lyomushangwahokololo. Omushangwahokolololo gwa ningwa pamukalo nguka ohagu ithanwa omushangwahokololo gwegano.

Okopi yodokumende ya dhengwa oshihako otandi yi mono ngiini?

Okopi ya dhengwa oshihako oto yi mono uuna Komufala gwomaganitho a tala modokumende yolela e ta gana kutya ofotokopi oya faathana lela nombapila ndji yolela. Oto vulu okumona Komufala gwomaganitho piisitasi yopolisi, moombaanga nomoombelewa dhoveta. Owu na okuulukila Komufala odokumende yolela nokopi. Komufala ota dhenge okopi oshihako opo u ulike kutya oyo okopi shili yodokumende yolela. Oto vulu okudhengitha iihako ookopi dhoodokumende dha simana opo u vule okupungula oodokumende dho dhene pehala lya gamenwa peha lyokweenda nadho.

Nkene to kaleke onzapo yevalo lyokamoye ya gamenwa

Onzapo yevalo lyokamoye oyo odokumende ya simana noonkondo. Owu na oku yi pungula pehala lya gamenwa. Osho omadhiladhilo omawanawa opo wu dhengithe iihako ookopi dhoonzapo, wu ningile komongula uuna onzapo ya kana. Oto vulu okulongitha ookopi miinima oyindji mpoka onzapo yevalo ya pumbiwa, shi vule to yi nonzapo yo yene.

Shoka to ningi uuna wa kanitha onzapo yevalo

Uuna wa kanitha onzapo yevalo lyokamoye, oto vulu okuninga eindilo lyokopi yayo kUministili wlikwagumbo nOmatembukilomo. Okuza mo 2010, ondando yokuningululitha onzapo yevalo oyo N\$30. Uministili wlikwagumbo nOmatembukilomo oyu ulike kutya owu na okuninga eindilo lyokopi yonzapo yevalo koshitopolwa hoka okanona ka valelwa hamoshitopolwa moka okanona kanyolithwa.

Uunona wa valwa PONDJE yondjokana

Uunona owindji muNamibia owa valwa kaavali mboka inaaya hokanathana. Ngele ino hokanwa kuhe yokamoye, opu na omilandu dhowina ndhoka tadhi landulwa uuna to ningi eindilo lyokunyolitha evalo lyokanona.

Mpaka opu na omayamukulo komapulo gamwe po gokwalukehe kombinga yokunyolitha okanona ka valwa pondje yondjokana.

Aavali ayehe oya pumbwa okugandja omapitikilo gawo opo ku nyolithwe evalo lyokanona ka valwa kondje yondjokana?

Aawe. Kehe omuvali ota vulu okunyolitha evalo lyokanona ka valwa kondje yondjokana. Omukulukadhi ngoka ta nyolitha evalo lyokanona ka valwa pondje yondjokana INA pumbwa okupewa epitikilo kuhe. Omukulukadhi ngoka ta nyolitha evalo lyokamwana ina pumbwa u ulike okatse kahe yako. Ngele omukulukadhi ina hala okugandja uukwatya washa kombinga yahe, kapu na nando ogumwe taka tumbula edhina lyahe monzapu yevalo. Uuyeleele kombinga yahe otawu vulu okugwedhwa mo konale, nokanona otaka vulu okupewa ofani yahe pompito ndjika ngele yina okwe shi pitika. Kape na ondando yasha pegwedhelo ndika. Ngele he onakusa, edhina lye itali vulu okugwedhwa mo konima yenyolitho.

Omulandu nguka ogu li moveta. Omunambelewa ita vulu okuthiminika omukiintu opo a gandje uuyeleele kombinga yahe yokanona uuna a hala okunyolitha evalo lyokanona kofani ye.

Ofani yalye yi na okulongithwa ngele okanona okavalwa kondje yondjokana?

1. Ngele omukulukadhi oye awike a nyolitha evalo yokanona nahe ina tulwa mo monzapu yevalo, okanona oke na okupewa ofani yayina. He ita vulu okutya sha ngele yina okwa hala okanona ki ithanwe nofani ye.
2. Ngele aavali ayehe oya popiwa mo monzapu yevalo, okanona otaka vulu okupewa ofani yayina nenge ofani yahe. Okanona otaka vulu ashike okulongitha ofani yahe uuna he nayina ya tsu kumwe mushika.

**Inandi hokana nahe noinandi hala edhina lye li
kale monzapu yevalo lyokamwetu, ashike he ota ti
kutya edhina lye oli na okukala monzapu.**

He ke na uuthemba wowina wokunyolwa monzapu yevalo. Ompango otayi ti kutya oku na ashike okunyolwa monzapu yevalo uuna omukulukadhi a gandja epitikilo.

**Oshike tashi ningwa po ngele aavali yokanona oya
hokana konima sho okanona ka valwa?**

Enyolitho lyevalo otali vulu okulundululwa opo ku nyolithwe evalo uuna ndoka aavali ya hokana konima sho okanona ka valwa. Olaikota ya piti otayi ka tuulwa mo momapeko gepangelo.

**Ompango yongashingeyi otayi ningile
aakulukahi naasamane inaaya hokana
sha yooloka. Shino oshi li okatongotongo
kopaukashikekookantu kaake li paveta?**

Okatongotongo kamwe pokati kaakulukadhi naasamane oki ikwatelela komayooloko gawo gopanshitwe. Omukulukadhi oku na okukala monzapu yevalo yokanona, ashike he otashi vuluka a kale kee mo. Ihe, omilandu dhimwe dhomompango odha za mo nale, sho sha li itashi vulu okuulikwa kutya olye he yokanona. Monena oshi li tashi vuluka opo ku longithwe omakonakono gopaunamiti (omakonakono goombinzi) opo ku monike kutya he yokanona hoka olye. Ngele omusamane ota vulu okuulika paushili, ota vulu okutamanana kutya ye oku na uuthemba wokukala monzapu yevalo yokanona nonando omukulukadhi ina hala. Ashike ompango oyi na okusimaneka shi li ngaashi shi li sigo uuna ndoka oompangu dhaNamibia tadhi ka gandja eyamukulo kepulo ndika.



**Onda nyolitha evalo lyokamwandje kedhina lyandje
molwashoka he kandi shi mpoka e li. Otandi vulu oku
ka tula mo edhina lyahe komasiku gokomeho?**

Eeno, oto vulu oku ke li tula mo konima yokunyolitha ngele he okwe shi pitike. Kapu na ondando yasha mushika. Ashike ito vulu okugwedha mo edhina lyahe komasiku gokomeho ngele okwa si.

Engongo

ETSEYITHO LYEVALO

Uunake	Pevalo lyokanona, nenge kehe ethimbo sigo osho okanona taka gwanitha omvula yimwe
Openi	Moshipangelo moka okanona ka vaelwa, ngele ohaya gandja omayakulo ngaka, nenge poombelewa dhUministili wlikwagumbo nOmatembukilomo dhopepepi dhomoshitopolwa. Oompangu dhimwe dhoomagestrata ohadhi nyolitha omavalo.

ENYOLITHO LYEVALO LYOKWATOKA

Uunake	Ethimbo kehe konima okanona ka gwanitha omvula
Openi	Poombelewa dhUministili wlikwagumbo nOmatembukilomo dhopepepi dhomoshitopolwa. <i>Enyolitho lya tokelwa ihali vulu okuningwa moshipangelo nando.</i>

Opo wu mone oombelewa dhUministili wlikwagumbo nOmatembukilomo dhopepepi, kwatathana nUministili konomola 061-2922111.

SHOKA WU NA OKWEETELELA KOMAINYOLITHO AGEHE

1. Okakalata koshipangelo (okakalata kongeleka nako otaka taambwa kwaamboka tayi inyolitha ya tokelwa ngele okakalata koshipangelo oka kana)
2. Okokamutse nenge opasporta yomuvali gumwe nenge aavali ayehe
3. Ngele aavali yokanona oya hokanathana: Onzapo yehokano nenge omushangwa-hokololo gwa za kumwene gwomukunda ngele aavali oya hokana kohi yompango yopamuthigululwakalo.



Ehokololo: Christina Beninger, Dianne Hubbard naRachel Coomer

Omundongeki: Ndalipo Mupupa

Omafano: Nicky Marais

Omutholomo netulomelandulathano: Perri Caplan

Omunyanyangidhi: John Meinert Printing (Pty) Ltd

Omukwatheli: Dutch Ministry of Foreign Affairs, MDG3 FUND

Omuholokithimbo: Gender Research & Advocacy Project, Legal Assistance Centre, 2011

Uministili wlikwagumbo nOmatembukilomo owa kwathele metote po lyokafo haka.

Okafo haka otaka vulu okuningwa ookopi/okwiindjipalekwa omolwomalalakano ge na sha nelongo, shampa ashike onzo ya tseyithilwa.

Ontopolwa yokanyolwa haka yopalusheno otayi adhika ko-website yo-LAC: www.lac.org.na